

# Jon 1

## leta pakanama ya girumina

---

### Yawasana riunama

**1** <sup>1</sup>Boni pakane yaba ya kenakenana inam yawasana riunama. Inam riunama vutuna tauma apasol beamaie kè vaiena, matamaie kè kita da kè kita yaḡe be nimamaie kè taikonina. <sup>2</sup>Inam vutuna yawasana, be yawasaninama tauma ḡaromaie ya maḡatara be matamaie kè kitakitana, vutuna yodi kawai matemate be yawasana kenakena nonoḡinama ḡaromie ka rarau guguyena. Inam yawasaninama noḡone Tamadama Mamaitua ḡarone kenakenanama, vutuna yodi ḡarode ya maḡatarana. <sup>3</sup>Be tauma aba matamaie kè kitakita be beamaie kè vaivaiena, vutuna yodi ḡaromie ka rarau guguyena da taumi mate sibo tèi rawateḡeidana Tamadama be Natunama Yesu Keriso ḡarodie.

<sup>4</sup>Uma kaudima ka girugirumidina ḡaromie da matabuda tàì nuavere tenaḡana aubainama.

### Yanae tà naḡona

<sup>5</sup>Be tauma Mamaitua ḡarone vari kè paḡo be ḡaromie ka rarau guguyena inam umanama: Mamaitua tauna yana, be tauna nopone nam kupi ima kenakenana, ibewa. <sup>6</sup>Be tauda kupi yawasanidima tà voivoiedina, be yaḡoro tà riuriuna da tauda Mamaitua mate tèi rawateḡeidana, tauda inam banaga kaikaiyovudama, be nam riukaua ruvane tama naḡonaḡona. <sup>7</sup>Be deḡoda yanae tà naḡona, maika tauna yanae e miamiana nama, inam raḡanine tauda tokare dà banabanagama mate tàì rawateḡeida be tauna natunama Yesu kosinine dà gewagewama matabudi e koḡa poredina.

<sup>8</sup>Be deḡoda tà riuna tauda nam gewagewa ḡarode, tauda inam tàwai kedadoka waigewadana, be riukaua nopode nam ima kenakenana. <sup>9</sup>Be Mamaitua inam banaga waipatutuna be didimaninama, aubainama tauna tokare dà gewagewama matabudi e noḡota poredi be dà yawasanama

barebaredima mate e koḡa poredina, deḡoda dà gewagewama tà kuvesidina. <sup>10</sup>Baninama Mamaitua ya riuna da banaga matabuda gewagewa banegidama. Be deḡoda tà riuna tauda nam gewagewa te voia rubuna, tauda inam Mamaitua tà riuriu waikaikayiovuna, be tauna na riuna tauda nopode nam ima kenakenana.

**2** <sup>1</sup>Yau sedama,<sup>a</sup> taugu uma kaidima ya riuriuemina da taumi nam gewagewa ko voiedi. Be deḡoda gewagewa ko voiena, naumeki da banaga tenaḡa tauda dà tausaguma e miamiana. Tauna vutuna tauda muride e midi be aubaidama Tamadama ḡarone e giugiuna. Tauna vutuna Yesu Keriso, didimana baneginama. <sup>2</sup>Tauna vutuna ya rauapaiyeda be dà gewagewama aubainama tubuḡine ya tipana aubaidama, be nam taudaḡa, ibewa da dobu matabuna adi gewagewama mate aubainama, yodibe Mamaitua nuanama ya subana.

<sup>3</sup>Be deḡoda Bada na riuvavasaḡama matabudi tà voteyeteyedina, inam tawai maḡatara munaḡedana da tauda inam tauna ḡarogaronama. <sup>4</sup>Be deḡoda tam aitau kwa riuna, “Taugu Mamaitua ḡaronama” be na riuvavasaḡama nam kwa voteyeteyedi, tam inam banaga kaikayiovumma be nam riukaua ruvane kuma miamiana. <sup>5</sup>Be deḡoda aitau Mamaitua na giuma e vovo teyeteyedina, tauna inam Mamaitua na wainuapaḡoma noponama ya moḡavuna. Be nema tà katai bake da tauda Mamaitua nopone tà miamia? <sup>6</sup>Aitau e riuriuna da tauna Bada ḡaronama, naumeki da Yesu nema ya naḡonaḡo bakona, nama tauna e naḡona.

### Riuvavasaḡa vaunama

<sup>7</sup>Yau banaga kauama, Bada Yesu ya riu vavasaḡedana da tauda dà banagama dà banagama sibo tèi nuapaḡoedina. Be inam riuvavasaḡinama nam riu vauna, ibewa da giunama teneḡinama taumi noḡone koya vaivaiena, vutuna yodi ya girugirumina. <sup>8</sup>Inam riuvavasaḡinama inam riu poranama, be you riu vaunama. Be inam riuvavasaḡinama inam riukaua, vutuna Keriso na yawasanae be taumi ami yawasanae ya maḡatarana, baninama tadiwanawana ya vaikoakoa be riukaua yananama yodi nopomie e yanayanana.

<sup>9</sup>Aitau e riuriuna da tauna yanae e miamiana, be deḡoda turanama ḡesau e gadogadoḡaiena, tauna inam tadiwanawana noponaḡa e naḡonaḡona. <sup>10</sup>Be aitau turanama ḡesau ewai nuapaḡoena, tauna inam yanae e naḡonaḡona. Be inam baneginama ḡarone nam aba gewagewanama ima kenakenana da tokare turanama ḡesau ei beku. <sup>11</sup>Be aitau turanama ḡesau e gadogadoḡaiena, tauna inam tadiwanawana noponaḡa e naḡonaḡo be e miamiana, baninama tauna matanama tadiwanawana ya suma tom be deḡo e naḡonaḡona nam i kataiena.

<sup>a</sup> 2.1 Riu ‘yau sedama’ inam nam na seda ḡoma. Be ibewa da tauna banaga poranama aubainama nama e riuriuna.

<sup>12</sup> Yau sedama, taugu uma kaudima yà girugirumidina ġaromie, be ko kataie da Mamaitua ami gewagewama ya noġota poredina, baninama Keriso tauda aubaidama ya mariyawa be ya gurina.

<sup>13</sup> Taumi dosi tautauġomimima, taugu uma kaudima yà girugirumidina ġaromie, baninama taumi Bada kaite koya kataiena, tauna vutuna boni pakane da yodi nama e miamiana.

Be taumi yarayaraga waisumeġimima, taugu uma kaudima yà girugirumidina ġaromie, baninama taumi Seitan koya vaisubana. Be taumi seda matabumi, taugu uma kaudima yà girugirumidina ġaromie, baninama taumi kaite Tamadama Mamaitua koya kataiena.

<sup>14</sup> Be mate dosi tautauġomimima, taugu uma kaudima yà girugirumidina ġaromie, baninama taumi Bada kaite koya kataiena, tauna vutuna boni pakane da yodi nama e miamiana.

Be taumi yarayaraga waisumeġimima, taugu uma kaudima yà girugirumidina ġaromie, baninama taumi koyai rewapanana, be Mamaitua riunama nopomie e kenakenana na rewapanae taumi Seitan koya vaisubana.

#### **Uma dobunama nam koi nuapaġoe**

<sup>15</sup> Uma dobunama be yaba matabudi nopone ta kenakenana nam koi nuapaġoedi. Be deġoda aitau uma dobunama ewai nuapaġoena, tauna inam Tamadama Mamaitua wainuapaġoenama nopone nam ima kenakenana. <sup>16</sup> Baninama yaba matabuna uma dobune tà kitedi be nuadama ta sorusrudina kitedima maika tubuġidama adi ġoanama, bo mata na ġoanama, bo banaga adi waiguyauma. Inam yabedima matabudi nam Tamadama marae ġarone be ti yovona, ibewa da taudi matabudi dobu ġaronama. <sup>17</sup> Uma dobunama be na ġoanama matabudi tokare ta samoana, be aitau Mamaitua na ġoanama e voivoiena, inam baneginama tokare e mia nonoġana.

#### **Keriso tauwai ġavienama**

<sup>18</sup> Yau sedama, yodi inam raġan damodie ta tavatavana. Be boni taumi koya vaie da Keriso tauwai ġavienama e veraverauna e tavana. Be Keriso tauwai ġavienama ġesaudima toitoi kaiteka ta tavatavana. Inam kaudima tauda tawai kataidana da kaiteka raġan damonama e tavatavana. <sup>19</sup> Inam banegidima noġone tauda mate tēwai taparoro tenaġana, be yodi a gosedana. Inam banegidima nam tauda dà banaga kaua, be deġoda taudi sibo tauda dà banagama, taudi tokare nam a gosedana. Tauda noġone taudi mate tē miamiana, be taudi a gosedana aubainama yodi tē kataie da inam banegidima taudi nam tauwai sumaġa damnama nopone tima miamiana. Be deġoda ti ġoena, tokare nam a gosedana. <sup>20</sup> Be taumi inam ibewa, baninama Banaga Babaunama kaite matabumi yai aiainimi,

be riukaua koya kataiena. <sup>21</sup>Taugu ġaromie yà girugirumana, nam ko noġoti da taumi kabe riukaua nam ko katakataie, ibewa da taumi riukaua koya kataiena aubainama ġaromie yà girugirumana. Be inam riukauinama nopone nam tokare kaiyovu tà banavi, ibewa. <sup>22</sup>Be yodi aitau kaikaiyovuna? Banaga aitau e riuriuna da Yesu tauna nam Tauwai yawasana, inam baneginama tauna vutuna banaga kaikaiyovunama, tauna vutuna Keriso tauwai ġavienama, baninama tauna Tamadama be Natunama Yesu tauboviedima. <sup>23</sup>Deġoda aitau Mamaitua Natunama e bovi-boviena, tauna nam tokare Tamanama e paġo be mate ta mia tenaġa. Be aitau Mamaitua Natunama ewai anine be e riuriuna da Yesu tauna Tauwai yawasana, inam baneginama tauna tokare Tamadama Mamaitua e paġo be mate ta mia tenaġana.

<sup>24</sup>Ko kita kaua da aba noġone ai kataimi be koya vaivaiena, naumeki da nopomie e kena nonoġana. Deġoda nopomie e kenana, taumi tokare natunama Yesu be Tamanama Mamaitua mate ko mia tenaġana <sup>25</sup>be yawasana kenakena nonoġinama ko paġona, inam vutuna tauna ya saugedana.

<sup>26</sup>Taugu uma yabedima yà girugirumidina ġaromie da yà riu wainoġotimina, baninama banaga ġesaudima ta ġoġoena da taumi tai doka waigewemina. <sup>27</sup>Be taumi Arua Babau kaite koya paġo be nopomie e miamiana. Vutuna aubainama yodi nam tauwai katakatai ġesau koma ġoġoena da sibo yai katakataimi. Baninama Arua Babau yaba matabudi ewai katakataimina, be aba tauna ewai katakataimina inam matabudi riukaua, be nam kaiyovu. Be Arua Babau aba yawai katakataimina, nama ruvane sibo raġan matabuna Keriso ġarone koya miana.

<sup>28</sup>Vutuna aubainama yau sedama, ko kaigurate da Yesu na yawasanae ko mia nonoġana. Be tauna e maġatarana raġanine, tauda tokare ma raudebatorada tauna noġone tà midina, be nam tà tunimayaġa. <sup>29</sup>Taumi koya kataiena da tauna didimana baneginama, be mate aitauga didimana ta voivoiedina, inam tauna na sedama.

### Mamaitua na sedama

**3** <sup>1</sup>Yodi ko kita da Mamaitua na wainuapaġoma ya moraba kauana ġarode, vutuna aubainama ya voieda da yodi na sedama tè tubuġana. Riukaua da na seda ġomama tauda! Be aba aubainama dobu banegidima tauda nam ti kataieda, inam baninama taudi Mamaitua nam ti kataiena. <sup>2</sup>Yau banaga kauama, tauda yodi Mamaitua na sedama tà miamiana, be nema tokare tà tubuġa bakona, yodi tauda nam te katai kauena. Be aba tè kataiena inam Bada e maġatarana raġanine tauda tokare tauna maika tà tubuġana, baninama inam raġanine tauna tokare bani ġominama matade tà kitana. <sup>3</sup>Be aitau da Kerisoe inam noġotinama ġarone e kenakenana, tauna yawasana miremiredima nam ima

voivoiedina, baninama Keriso mate tauna nam yawasana miremiredima i voiedina.

<sup>4</sup>Aitauḡa gewagewa ta voivoiedina, taudi tarawatu tawai mia kotova kauena. Baninama gewagewa inam tarawatu tauvagudagudanama. <sup>5</sup>Be taumi koya kataiena da Yesu ya maḡatarana gewagewa noḡota porenama aubainama. Be tauna nopone nam gewagewa ima kenakenana. <sup>6</sup>Be aitau tauna ḡarone e miamiana, tauna nam gewagewa ima voivoiedina. Be aitauḡa gewagewa tawai borudidina, taudi Yesu nam ti kitana, bo nam ti kataiena.

<sup>7</sup>Yau sedama, ko kita kaua da nam aitau e boru waideḡemi. Aitau da didimana e voivoiena, naumeki da tauna banaga didimaninama, Yesu didimaninama e miamiana maika. <sup>8</sup>Be aitau gewagewa e voivoiena, tauna inam Diaboro ḡaronama, baninama Diaboro tauna boni pakane nama gewagewa ya voivoiena. Inam vutuna aubainama Mamaitua Natunama ya yovo be ya maḡatarana da Diaboro na noyama e kawa gewegewedina. <sup>9</sup>Aitau Mamaitua ḡarone ya tubuḡa vitarana, tauna tokare nam gewagewa ei borudidi be kwa kita. Baninama tauna nopone Mamaitua yawasana ya boruna maika pesi. Tauna nam teneteneḡina da gewagewa e voiedi, baninama tauna Mamaitua ḡarone kaite ya tubuḡa vitarana. <sup>10</sup>Tokare nema tà katai bake da deḡo taudi Mamaitua na seda, be deḡo taudi Diaboro na seda? Umanama tokare tà kataiena: Aitau da nam turanama imawai nuapaḡoena, be nam yawasana didimanidima ima voivoiedina, tauna inam nam Mamaitua Natuna.

### **Turamma turamma nuamma e paḡo**

<sup>11</sup>Uma varinama vutuna noḡone tè vaivaiena yodi yà riuemina, tauda sibo turadama turadama nuadama ya paḡona. <sup>12</sup>Be nam sibo Kein na yawasanama tè paḡo. Tauna Diaboro ḡaronama be tasinama yai gurina. Be aba sabine tasinama yai guri? Baninama Kein inam voia gewegewedima ya voivoiedina, be tasinama tauna voia didimanidima ya voivoiedina, aubainama tasinama yai gurina. <sup>13</sup>Yau banaga kauama, deḡoda dobu banegidima ta tuaḡaiemina, nam ko nuababaḡa.

<sup>14</sup>Tauda turadama turadama nuadama e paḡopaḡona, be inam kedane tauda tè kataiena da guri inam muride tè gose pore be yodi yawasana tè paḡona. Be aitau da nam imawai nuapaḡona, tauna inam gurinama e miamiana. <sup>15</sup>Be aitau da turanama e tuatuaḡaiena, tauna inam tauvunuḡa e miamiana. Be taumi koya kataiena da tauvunuvunuḡa nopone yawasana kenakena nonoḡinama nam ima kenakena rubuna. <sup>16</sup>Tauda yodi tokare Kerisoe wainuapaḡo tà kita be tà kataiena, baninama Yesu tauda aubaidama ya mariyawa be ya gurina. Be tauda mate sibo dà yawasanama muride tè boru be dà banagama sibo tè sagudina, deḡoda guri tè banavi bo ibewa, inam matabuna naumeki. <sup>17</sup>Deḡoda aitau ḡarone

taragai be turanama ḡesau ya kita da taragai e marumarubiena, be tauna nam i raunuatoie be i saguna, be tauna e riuriuna da Mamaitua ewai nuapaḡoena, inam nemanama?

<sup>18</sup>Yau sedama, nam mududaḡa wainuapaḡo e riuriue, ibewa da voinama mate. Inam vutuna wainuapaḡo riuriukauinama. <sup>19</sup>Inam kedane tè kataie da tauda riukaua ḡarogaronama, be tokare Mamaitua noḡone nuadama torane tà midina, <sup>20</sup>avedi da nopode tà noḡota bekubekuna, be inam nam tà noḡoti. Mamaitua yaba matabudi ya kataiedina, vutuna aubainama tauna inam noḡota bekubekudima nam ima siesievidina, be tauna wainuapaḡo banidima tà voiedina, vutuna e siesievidina.

<sup>21</sup>Yau banaga kauama, nopodama nam e vobekubeku, be nuadama torane Mamaitua noḡone tà midina, <sup>22</sup>be ḡarone aba tàì baḡena, tauna tokare e utedana, baninama tauda na riuvasasaḡama tà vovo teyetyedi be yaba matabuna tà voivoiedina, inam raḡanine tauna nuanama tà taiverena. <sup>23</sup>Be Mamaitua na riuvasasaḡama inam umanama: Tauna Natunama Yesu Keriso tàì sumaḡe, be turadama turadama nuadama e paḡona tauna ya riuriu vavasagaḡedana nama. <sup>24</sup>Taudi aitaḡa na riuvasasaḡama ta vovo teyetyena, taudi vutudi Keriso nopone ta miamiana, be Keriso taudi nopodie e miamiana. Tauna Aruinama ya utedana, aubainama tè katai kauena da Keriso tauda nopode e miamiana.

#### Arua ko kita kauedina

**4** <sup>1</sup>Yau banaga kauama, banaga ḡesaudima ta riuriuna da taudi arua a paḡo be ta giugiuna, inam banegidima nam koi sumaḡedi, ibewa da noḡone ko kita kauedina, deḡoda taudi arua Mamaitua ḡarone a paḡo bo ibewa. Baninama peroveta kaikaiyovudima toitoi dobue ta naḡonaḡo bababarana. <sup>2</sup>Be aitaḡa da Mamaitua Aruinama ḡarone, tauna tokare umanama ko kita be ko kataiena: Tauna aitaḡa e riuriuna da Yesu Keriso tauna Mamaitua ḡarone be ya yovo da yai rawabanaga ḡomana, inam baneginama tauna Mamaitua Aruinama ḡarone. <sup>3</sup>Be aitaḡa deḡoda Yesu nam ei maḡatari, inam baneginama tauna arua nam Mamaitua ḡarone i paḡona, ibewa, tauna inam Keriso tauwai ḡavienama aruinama ya paḡona. Noḡone koya vaiena da Keriso tauwai ḡavienama tokare e veraverauna e tavana. Tauna vutuna yodi dobue e naḡonaḡo bababarana.

<sup>4</sup>Be yau sedama, taumi Mamaitua ḡarogaronama, aubainama uma banegidima koya vaisubedina, baninama Arua nopomie e miamiana, tauna yai rewapana kauana, nam arua dobue e miamiana maika. <sup>5</sup>Taudi inam dobu ḡarogaronama aubainama, dobuḡa kaidima ta giuedi be ta naḡonaḡona. Be dobu banegidima inam perovetedima kaikaiyovudima ta vaiedi be tawai muriwatanedina. <sup>6</sup>Be tauda inam Mamaitua ḡarogaronama, be aitaḡa Mamaitua na seda ḡomama, taudi dà giuma

ta vaiedi be tawai muriwatanedina. Be aitaugā Mamaitua nam na seda, taudi dā giuma nam tima vaiedi be tima voivoiedina. Inam kaudie tauda tokare tà katai kaue da deḡo tauna arua riuriukauina, be deḡo tauna arua kaikaiyovuna.

### Mamaitua tauna vutuna wainuapaḡo

<sup>7</sup>Yau banaga kauama, tauda turadama turadama nuadama e paḡona, baninama wainuapaḡo inam Mamaitua ḡarone be ya yovona. Be aitaugā tawai nuapaḡona, taudi inam Mamaitua ḡarone a tubuḡa vitara be Mamaitua a katai kauena. <sup>8</sup>Mamaitua tauna wainuapaḡo. Vutuna aubainama aitau da nam imawai nuapaḡona, tauna inam Mamaitua nam i kataiena.

<sup>9</sup>Mamaitua na wainuapaḡoma ḡarode umanama yai maḡatarina, tauna nuanuanama natunama tenaḡa ḡominama ya riupore yovoḡena dobue, da yodi taune tauda yawasana ḡarone tà paḡo be tà miana. <sup>10</sup>Be Mamaitua na wainuapaḡoma inam umanama: Nam tauda tei nuapaḡo dokena, ibewa da tauna tauda yai nuapaḡo dokeda be natunama ya riupore da aubaidama ya rauepaiyada be tubuḡine ya tipedana dā gewagewa sabine, yodibe Mamaitua nuanama ya subana.

<sup>11</sup>Yau banaga kauama, Mamaitua kaite yai nuapaḡoedana, aubainama tauda mate dā banabanagama sibo tèi nuapaḡoedina. <sup>12</sup>Nam aitau deḡo mata ḡomine Mamaitua i kita rubuna, be deḡoda tauda turadama turadama nuadama e paḡona, tauda inam Mamaitua nopode e miamiana. Be tauna na wainuapaḡoma nopode ya moḡavuna, be yodi inam wainuapaḡonama parata boruborune ya tavana.

<sup>13</sup>Tauna aruinama tauda ya utedana. Vutuna aubainama tè kataie da Mamaitua tauda nopode e miamiana, be tauda tauna nopone tà miamiana. <sup>14</sup>Tamadama Mamaitua Natunama ya riupore yovoḡena dobue da tauna dobu matabuna tauwai yawasaninama. Be tauna vutuna tauma kè kita be kawai matamatana. <sup>15</sup>Deḡoda banaga aitau e riuriuna da Yesu tauna riukaua Mamaitua Natunama, inam baneginama nopone Mamaitua e miamiana, be tauna Mamaitua nopone. <sup>16</sup>Be tauda tè kataie be tàwai sumagēna da Mamaitua ewai nuapaḡoedana.

Mamaitua tauna vutuna wainuapaḡo, be aitau wainuapaḡoe e miamiana, inam baneginama tauna Mamaitua nopone e miamiana, be Mamaitua inam baneginama nopone. <sup>17</sup>Inam kedane wainuapaḡo nopode e moraba be parata boruborune e tavana, inam raḡanine tauda tokare etara raḡanine nuadama torane tà midina be nam tà naira, baninama uma dobue tauda dā yawasanama Keriso na yawasanama maika.

<sup>18</sup>Be wainuapaḡo banegidima taudi nam ma nairidi tima miamiana. Baninama raḡanine wainuapaḡo e moraba be parata boruborune e tavana, naira tokare e tauriena, be aitau ma nairina e miamiana, inam

baninama tauna kovoḡa e nainairena. Vutuna aubainama deḡoda naira nama tà kitana, inam wainuapaḡonama nam i moraba be parata boruborune i tavana, ibewa. <sup>19</sup>Tauda tàwai nuapaḡona, baninama Mamaitua noḡone yai nuapaḡo dokedana aubainama.

<sup>20</sup>Deḡoda aita u e riuriuna, “Taugu Mamaitua yàwai nuapaḡoena.” Be nuanama nopone turanama e gadogadoḡaiena, tauna inam banaga kaikaiyovunama. Uma kwa noḡoti: Turamma matame kwa kitakitana be nam kumawai nuapaḡoena, nema tokare Mamaitua kwai nuapaḡo bake? Baninama Mamaitua tam nam ku kita rubuna. <sup>21</sup>Be tauna umanama ya riu vavasaḡedana: Aita u da Mamaitua ewai nuapaḡoena, naumeki da dobie turanama mate ei nuapaḡoena.

### Waisumaḡe dobu yawasanidima tà vaisubedina

**5** <sup>1</sup>Aitaḡa tawai sumaḡana da Yesu tauna Tauwai yawasana, taudi inam Mamaitua natunatunama. Be aitaḡa Tamadama tawai nuapaḡoena, naumeki da natunama mate tà nuapaḡoena. <sup>2</sup>Deḡoda tauda Mamaitua tà nuapaḡoe be na riuma tà voteyeteyedina, inam raḡanine tokare banaga ta kita be ta kataie da tauda Mamaitua na sedama mate tàwai nuapaḡoedina. <sup>3</sup>Mamaitua wainuapaḡoenama inam umanama: Tauna na riuvasaḡama tà vovo teyetyedina. Be inam riuvasaḡidima ḡarode nam ti piripirina, <sup>4</sup>baninama aitaḡa Mamaitua ḡarone a tubuḡa vitarana, taudi inam dobu yawasanidima a vaisubedina, baninama adi waisumaḡama debane. <sup>5</sup>Aita u tokare dobu yawasanidima e vaisubedi? Tauna aita u ewai sumaḡana da Yesu tauna Mamaitua Natuḡominama, tauna tokare dobu yawasanidima e vaisubedina.

<sup>6</sup>Yesu Tauwai yawasana tauna ya yovona tauda ḡarode. Be Arua Babau ḡarode yai maḡatarana da Yesu tauna riukaua Mamaitua Natuḡominama, baninama tauna upae ya babataito be korosie kosininama ya darorona. Be yodi nam upa taunaḡa tà noḡoti, ibewa da kosina mate tà kita be tà kataie da Yesu tauna riukaua da Mamaitua Natuḡominama ya gurina. Be inam kaudima Arua ewai maḡataridina tauda ḡarode. Be Arua aba ewai matematena, nam aita u e riuwai kaikaiyovu, baninama Arua tauna naumeki da riukaua. <sup>7-8</sup>Yodi tà kita da uma yabedima rabuiteḡa; inam Arua, upa be kosina tawai matamatana da inam riukaua. Be taudi rabuiteḡa ai anina tenaḡa da inam riukaua. <sup>9</sup>Be banaga ḡoma adi kauama ta giuguedina tauda tàwai aninedina, be you, Mamaitua aba ḡarode ya giuguedina inam a moraba guratana. Vutuna aubainama Mamaitua natunama varinama yawai matematena sibo tè paḡo be tèi sumaḡena. <sup>10</sup>Aitaḡa Mamaitua Natunama tawai sumaḡena, taudi nopodie Mamaitua riunama e kenakenana. Be aitaḡa nam timawai sumaḡena, taudi Mamaitua ta riuri waikakaiyovuna, baninama tauna Natunama varinama yawai matematena taudi nam ti paḡo be ti sumaḡena.

<sup>11</sup> Be aba Mamaitua e giugiuena inam umanama: Tauna yawasana kenakena nonoġinama ya utedana. Be inam yawasaninama tokare natunama Yesu ġarone tà banavina. <sup>12</sup> Aitau Mamaitua Natunama Yesu ya paġo be ġarone e miamiana, tauna inam yawasana ya banavina. Be aitau Mamaitua Natunama nam i paġona, tauna yawasana nam i paġona.

### Jon na giuma damodamodima ya sivudina

<sup>13</sup> Taumi aitauga Mamaitua Natunama isanama kowai sumaġena, ġaromie uma letanama yà girugirumina da sibo koya kataie da taumi kaite yawasana kenakena nonoġinama koya paġona. <sup>14</sup> Be deġoda tauda na noġotama ruvane tà baġana, tauda tè katai kauena da tauna tokare bonadama e paġona. <sup>15</sup> Be tauna bonadama e paġopaġona, naumeki da aba ġarone tèwai baġena inam kaite tè paġona.

<sup>16</sup> Deġoda ai turamma kuya kita be gewagewa e voivoiena, be nuanama e vitarena, naumeki inam gewagewanama nam guri kedanama ima watawatanina, naumeki da tauna aubainama kwa moiragai be Mamaitua ei yawasanina. Be deġoda ai turamma gewagewama e voivoiena be nuanama nam e vitare, inam gewagewanama guri kedanama e watawatanina, inam tauna aubainama nam kwa moiragi. <sup>17</sup> Be yawasana barebaredima matabudi isedima inam gewagewa, be gewagewa ġesaudima damodie guri nam tima kenakenana.

<sup>18</sup> Tauda tè kataiena da aitau Mamaitua ġarone ya tubuġa vitarana, tauna nam gewagewa ima voivoiedina. Mamaitua inam baneginama e raberabe kauena, be Diaboro tokare nam tauna e taukoni yababe. <sup>19</sup> Tauda tè kataiena da tauda riukaua Mamaitua na sedama, be dobu banegidima taudi inam Diaboro na waibadae ta miamiana. <sup>20</sup> Be mate tè kataiena da Mamaitua Natunama ya yovo be yai katakataidana da tauna aitau riuriukauinama vutuna tà kataiena. Be tauna vutuna riuriukauinama nopone tà miamiana. Be mate tauna Natunama riuriukauinama nopone tà miamiana, inam tauna Yesu Keriso, tauna vutuna Mamaitua riuriukauinama, be yawasana kenakena nonoġinama.

<sup>21</sup> Yau sedama, kokoitau nam ko rauduneedi, avedi!